

**Convenio de colaboración entre o Parlamento de Galicia e o Centro Galego de Barcelona para a reedición do libro “Ante o Estatuto. Unificación e diversificación das nacionalidades”**

**REUNIDOS**

O **Excmo. Sr. D. Miguel Ángel Santalices Vieira**, na súa condición de presidente do Parlamento de Galicia, actuando ao abeiro das facultades que lle confire o artigo 31.1 do Regulamento da Cámara do Parlamento de Galicia,

**D. Carlos Mandianes Araujo**, presidente do Centro Galego de Barcelona, elixido na reunión da Xunta Directiva o 14 de febreiro de 2017, e actuando ao abeiro das facultades outorgadas polo artigo 24 dos Estatutos da entidade.

Ambas partes recoñecen a súa competencia e capacidade para formalizar o presente CONVENIO DE COLABORACIÓN, e para tales efectos,

**EXPOÑEN**

**Primeiro.** O Parlamento de Galicia, comprometido coa protección e promoción da cultura e da vida política e social galega en todos os planos da vida pública e cultural, quere seguir contribuindo a facilitar o seu coñecemento, promoción, arraigo e consolidación, dispoñendo, para tal fin, e na medida das súas posibilidades, dos medios que sexan necesarios e eficaces para conseguilo.

**Segundo.** O Centro Galego de Barcelona, entidade privada inscrita no rexistro de galegidade da Xunta de Galicia co nº CG\_0104/2015, (co CIF nº G08890956), cuxos orixes se remontan a 1892 e, polo tanto, un dos máis antigos de España, ten o firme compromiso de manter a identidade galega e proxectar a cultura de Galicia en Cataluña, desenvolvendo actividades de divulgación da idiosincrasia, cultura e costumes galegos entre os seus socios, os seus descendentes e o público en xeral.

Combina o desenvolvemento dunha ampla programación sociocultural (concertos, teatro, conferencias, festas,...) coa organización de cursos e talleres de diversas disciplinas. A música, a danza, o teatro e a lingua galega son as principais liñas da acción formativa dirixida a manter os vínculos dos galegos emigrados á Barcelona así como aqueles outros que se aproximan ás súas instalacións para coñecer mais da cultura galega.

Destaca, de entre as súas actividades da difusión da cultura galega, a biblioteca Otero Pedrayo, especializada en temas galegos: literatura, historia, xeografía, tradicións populares, música, guías de Galicia, bibliografía sobre o Camiño de Santiago, xeoloxía e economía, entre outros, e que recibe diariamente prensa galega e prensa catalá, así como o Diario Oficial de Galicia e o Boletín do Parlamento de Galicia, e revistas galegas e de asociacións.

Dentro do seu amplo elenco de actividades destacou sempre o compromiso co desenvolvemento político e social de Galicia e o seu autogoberno, chegando a organizar conferencias divulgativas en Barcelona co motivo da elaboración do primeiro Estatuto de Autonomía. Destaca especialmente a celebrada o 25 de xullo de 1932 por D. Manuel Portela Valladares, da que posteriormente se editou unha publicación titulada “Ante o Estatuto. Unificación e diversificación das nacionalidades”, da que o Centro Galego en Barcelona posúe todos os dereitos de divulgación.

**Terceiro.** Na memoria que consta no expediente, xustifícase a concesión directa de subvención no indubidable interese cultural que supón o coñecemento desa intensa etapa da historia de Galicia, fito ineludible e precursor da actual estrutura institucional e política da nosa Comunidade, sen a que non é posible entender o seu encaixe na arquitectura constitucional da España actual. Asemade a achega ten carácter excepcional, debido a concreción da actuación a subvencionar, coincidindo co 35º aniversario do Parlamento de Galicia, así como o 125º aniversario do Centro Gallego de Barcelona, o que permite acollerse ao outorgamento en réxime de concesión directa.

Tendo mutuo interese ambas parte na difusión de tan importante legado político, as partes acordan asinar este Convenio de colaboración que se rexerá polas seguintes

## CLÁUSULAS

### Primeira. Obxecto do convenio

O presente convenio ter por obxecto establecer os mecanismos de colaboración entre o Parlamento de Galicia e o Centro Galego de Barcelona, para a difusión da lingua e cultura galega en Barcelona, consistente na reedición dun libro sobre a conferencia impartida o 25 de xullo de 1932 no Centro Galego de Barcelona polo insigne D. Manuel Portela Valladares, galego de ampla e significativa traxectoria política e xurídica marcada polo seu amor a Galicia.

O libro a reeditar, que será de titularidade o Centro Galego en Barcelona, titúlase: “Ante o Estatuto. Unificación e diversificación das nacionalidades”.

### Segunda. Declaracións e Obrigas das partes

A) O Centro Gallego de Barcelona declara:

- 1º. Dispor dos dereitos do material do libro editado en outubro de 1932 que inclúe debuxos de Alfonso Daniel Rodríguez Castelao e incorpora un complemento histórico elaborado polo propio Centro Galego.
- 2º. Comprometerse á reedición, maquetación e impresión de 600 exemplares, que disporán na cuberta do logotipo do Parlamento de Galicia.
- 3º. Que disporá dos exemplares para a súa difusión, divulgación e distribución gratuíta.
- 4º. Que non esta incurso en ningún dos supostos de prohibición do artigo 13 da lei 38/2003 nin do artigo 10 da lei 9/2007 de subvencións de Galicia
- 5º. Que non solicitou nin obtivo outras axudas ou ingresos para a mesma actuación obxecto do convenio
- 6º. Que cumprirá cos termos do convenio xustificando o importe da achega no prazo e coa documentación seguinte que remitirá ao Parlamento de Galicia:
  - Factura da reedición, maquetación e impresión do libro acompañada do documento acreditativo de abono vía transferencia.
  - Certificados de estar ao corrente coas obrigas tributarias e coa Seguridade Social.
  - Certificación acreditativa do representante legal da entidade do importe das axudas percibidas para esta actividade. Esta axuda é incompatible con outras axudas para esta actuación concreta (reedición do libro) posto que se subvenciona ao 100%, mais debe certificarse tal extremo por parte da entidade.

- Declaración asinada polo representante legal da entidade, de que esta non deduce nin compensa o IVA dos subministracións ou servizos que solicita.
- Certificado da conta bancaria a nome da entidade en que efectuar o pagamento.

No tocante á publicidade da achega quedará acreditada co logotipo do Parlamento de Galicia na cuberta dos libros e a publicidade no Portal de Transparencia do Parlamento de Galicia, ademais do estipulado na cláusula quinta.

B) O Parlamento de Galicia colaborará no custe da reedición, maquetación e impresión ao abeiro da normativa aplicable en materia de subvencións, nos termos da cláusula seguinte.

### Terceira . Financiamento

O Parlamento de Galicia financiará o cento por cento da actuación con 4.000,00 €, con cargo á aplicación orzamentaria 01.01.111B. 470.00.

Unha vez presentada en tempo e forma pola entidade a documentación xustificativa, será obxecto de control financeiro e aprobarase, previo informe da Intervención, mediante Resolución da Presidencia.

O incumprimento da obriga de xustificar o gasto subvencionado dará lugar á perda da subvención concedida na parte non xustificada. De non xustificarse axeitadamente seguirase o procedemento establecido no artigo 42 da lei xeral de subvencións.

### Cuarta. Duración

Este Convenio de colaboración estará vixente durante o tempo necesario para a reedición e impresión do libro e posterior xustificación, que en todo caso non poderá estenderse máis de 7 meses dende a data da súa sinatura.

Se rematado este prazo non fora posible, por motivos alleos á vontade das partes, ter editado e publicado o libro e xustificar o gasto polo Centro Gallego de Barcelona, as partes poderán prorrogalo polo tempo indispensable para posibilitar o cumprimento do fin deste Convenio, sen que poida estenderse esta prórroga máis aló do 15 de decembro de 2017. A posible prórroga deberá constar por escrito mediante addenda a este Convenio.

O convenio extinguirase polo cumprimento do seu obxecto ou por incorrer en algunhas das causas de resolución da cláusula oitava.

### Quinta .- Difusión da colaboración das partes

Nas actividades formativas, informativas e divulgativas e nas actuacións respecto da reedición do libro obxecto deste convenio farase constar a colaboración das partes e utilizaranse, cando proceda, a identidade corporativa de cada unha das Institucións.

A sinatura deste Convenio supón o consentimento expreso de ámbalas partes para facer públicos a través dos diarios oficiais que procedan e das respectivas webs, os datos referidos ao seu contido de conformidade coa normativa sobre transparencia e boas prácticas que sexa de aplicación a cada unha delas.

### Sexta. Comisión de Seguimento

Coa finalidade de asegurar o cumprimento deste Convenio, crearase unha comisión de seguimento composta por un representante de cada unha das Institucións, que coordinará o seu

desenvolvemento e estará facultada para resolver cantas dúbidas puidesen xurdir na súa execución; poderá estar asistida polos técnicos que xulguen necesarios.

Os acordos adoptados pola Comisión serán inmediatamente executivos.

Terá, ademais, as seguintes funcións:

- A interpretación do convenio.
- A proposta de addendas ou modificacións.
- Informe previo á resolución por incumprimento.
- Facultades de supervisión da execución e adopción das decisións e ditado das instrucións necesarias co fin de salvagardar a correcta realización das actividades acordadas.
- Calquera outra relacionada co bo funcionamento deste Convenio.

#### **Sétima.- Modificación**

As partes, ou a comisión de seguimento, poderán instar a modificación deste Convenio en calquera momento. Mediante addenda achegárase as modificacións sobre o seu contido acordado pola partes.

As propostas de modificación deberán ser comunicadas por escrito cunha antelación dun mes.

#### **Oitava. Resolución.**

Serán causas de resolución deste convenio:


- O transcurso do seu prazo de vixencia sen terse acordado a súa prórroga.
- O mutuo acordo entre as partes.
- A denuncia de calquera das partes, formulada cun mes de antelación e por causas xustificables.
- O incumprimento total ou parcial das cláusulas contidas neste convenio.
- Por decisión xudicial declaratoria da nulidade do convenio.

#### **Novena. Réxime xurídico.**

Este convenio ten natureza administrativa e rexeráse pola Lei 40/2015, do 1 de outubro, de réxime xurídico do sector público; e as cuestións litixiosas que poidan xurdir na interpretación e cumprimento do presente convenio de colaboración serán de coñecemento e competencia da orde xurisdiccional do contencioso-administrativo.

Asemade rexeráse pola normativa aplicable en materia de subvencións.

En proba de conformidade asíñase este convenio por triplicado en Santiago de Compostela o 23 de marzo de 2017.



**Excmo. Sr. D. Miguel Ángel Santalices  
Vieira**, presidente do Parlamento de Galicia.



**D. Carlos Mandianes Araujo**, presidente  
do Centro Galego de Barcelona.

DENDE 1892  
Centro Galego de Barcelona  
C.I.P. 216, 05-37 - 08002 Barcelona